

Orts / zu sonderbaren Ehrengedechtnus diese Predigt in druck zu geben / in fleissiger Betrachtung / daß es recht vnd wol gesagt: *Quæ defunctis dantur, mera est pietas, merus amor, summa gratitudo, & vivax transactæ vitæ usufructuariæ testimonium*, Das ist / Was den Verstorbenen gethan vnd erzeiget wird / das ist lauter Gottseligkeit / lauter Lieb / lauter Danckbarkeit vnd ewigwerendes Zeugnis ihres verbrachten zeitlichen Leben vnd Wandels. Vnd weiln die Hochbetrübtte hinderlassene Fraw Wittib / meine gnädige Gräfin vnd Fraw / So woln auch die gantz betrübte Hochlöbliche Freundschaft / dieses bey mir gesucht haben / Habe ich J. J. Gn: Gn: sämtlichen Ehrlichen / Löblichen vnd Christlichen Begern billig stat geben / vnd dieses nicht abschlagen wollen oder können / Damit J. J. Gn: Gn: sämtlich vnd sonderlich Ihres Hertzfrömen Gemahls / vnd trewen sorgfeltigen Herrn Vaters / ein ewiges Memorial vnd Gedechtnus haben / vnd hierdurch auch vnserg Wohlseigen Grafen vnd Herren letzter Grab vnd Ehren Tag desto bas möchte geschmücket vnd gezieret werden.

Wolan / diese gemelte vrsachen / Wolgeborner gnediger Graf vnd Herr / haben nunmehr mich dohin bewogen / das ich gegenwertige geringe Leichpredigt in druck kommen lasse / verhoffens / es werdens ihm J. Gn. (ob sie gleich nicht so wol polirt vnd gezieret / wie sie wol sein solte) in Gnaden auch belieben vnd nicht mißfallen lassen / nach dem gemeinen Verslein: